

ČENGIĆ SAFUDIN

Član Izvršnog i Upravnog odbora UP FBiH

UDRUŽENJE POSLODAVACA FBiH

- n/r Predsjednika i direktora -

Poštovani,

Tokom prethodnih nekoliko mjeseci, u medijima ali i na zvaničnim skupovima, plasirane su određene informacije i komentari u kojima se predstavnici Udruženja poslodavaca FBiH izjašnjavaju ili podržavaju neke prijedloge koji nemaju utemeljenje u odlukama organa Udruženje, odnosno, po mojem mišljenju, nisu odraz zajedničkog stava organa Udruženja, te zbog toga mogu imati negativne posljedice i narušiti ugled Udruženja

Kao dugogodišnji član Udruženja poslodavaca FBiH dužan sam iskazati svoju bojazan i istaknut nekoliko događanja ili mjera koje, po mojem mišljenju, nisu na adekvatan način tretirana i mogu imati negativne posljedice po ukupan poslovni ambijent i uslove poslovanja svih poslodavaca u Federaciji BiH.

1. Neutralni efekt

Nije mi jasno zašto smo, kao poslodavci, prihvatili da je za nas uspjeh reformi postizanje „neutralnog efekta“ koji znači da se neće dodatno opteretiti poslovanje u Federaciji BiH. Ovo, posebno, iz razloga što smo u prethodnih nekoliko godina, kroz razne publikacije i istraživanja, isticali neodrživost opterećenja koja su nam uvedena kroz fiskalne ili parafiskalne namete.

Iako Reformska agenda upućuje na to da se mora smanjiti opterećenje poslodavaca, iznenađuje to da su neki poslodavci, izgleda, prihvatili ili čak iskazuju zadovoljstvo sa prijedlogom Vlade da se opterećenja zadrže na postojećem nivou, odnosno da se postigne „neutralan efekt“.

Imajući u vidu da je Vlada, od usvajanja Reformske agende, donijela 15 zakonskih i podzakonskih akata, koja su dodatno opteretile poslovanje privrednih subjekata, predlažem da Upravni odbor UP FBiH zauzme jasan stav kojim će se izraziti nezadovoljstvo Udruženja poslodavaca što Vlada ne poduzima potrebne mjere za smanjenje opterećenja poslovanja u Federaciji BiH.

Ukoliko to, na puno konkretniji način, ne učinimo Vlada će smatrati, ako već to do sada nisu zaključili, da su se poslodavci pomirili sa činjenicom da nemaju nikakvu snagu i moć te da su odustali od zahtjeva koje su istaknuli u brošuri objavljenj prije izbora 2014. godine.

2. Povećanje stope PDV-a

Porez na dodanu vrijednost (PDV) je instrument vlasti kojom obezbjeđuje najveći dio prihoda kojima pokriva troškove administrativnog aparata i svih drugih institucija koje se finansiraju iz budžeta raznih nivoa vlast (općina, kanton, entitet i država). U BiH je utvrđena jedinstvena stopa PDV u iznosu od 17%, koju svaki poslodavac mora platiti do 10. u mjesecu za prethodni mjesec.

Tokom proteklih mjeseci, pa i godina, od strane uglednih ekonomista, raznih udruženja, te u zadnje vrijeme i određenih političkih opcija traži se uvođenje više stopa PDV. Posebno su, za nas poslodavce, značajne inicijative da se plaćanje PDV vrši poslije izvršene naplate ispostavljene fakture ili da se PDV plaća 60 dana od dana ispostavljanja fakture do inicijative da se kupac obaveze da u roku od 15 dana plati dio faktutre koji se odnosi na iznos PDV a ostatak prema ugovorenom roku plaćanja.

Upravo iz naprijed navedenih razloga, te činjenice da viša stopa PDV znači i povećanje troškova proizvodnje odnosno usluga, iznenađuju izjave predsjednika Upravnog odbora g-dina Smailbegovoća da se Udruženje poslodavaca ne protivi povećanju stope PDV-a uz prijedlog da dođe do smanjenja doprinosa.

Iskreno, ne sjećam se da je Upravni odbora u sadašnjem sazivu (raniji saziv to sigurno nije) raspravljao o ovoj temi niti da li je podržao namjeru Vlade da poveća stopu PDV. Također, iz iskustva znam da do sada Vlada nikada nije ispunila obećanje ili naš zahtjev da se uvedeno opterećenje po jednom zakonu anulira drugim zakonskim rješenjem (npr. ukidanje povlastica za izvoz i investiranje sa novim zakonom o poticajima, ili primjena odredaba Općeg kolektivnog ugovora na prostor cijele Federacije BiH, ili....)

Imajući u vidu naprijed navedeno zamolio bih da se o ovome obavi rasprava na prvoj narednoj sjednici Upravnog odbora te zauzme stav o eventualnom povećanju stope PDV.

3. Dodatna akciza na gorivo

Još malo je ostalo do dana kada ćemo, kao poklon, dobiti novi namet koji se zove „dodatna (jedna već postoji) akciza na gorivo“ u visini od 0,176 KM (17,6 feninga) na svaki litar goriva. Svjesni smo činjenice da će ista prouzrokovati lančana povećanja cijena proizvoda i usluga te da će dodatno opteretiti svakog poslodavca.

U više navrata predlagao sam da se, kao Udruženje, angažiramo te putem saopćenja, radionica, sastanaka ili direktnog lobiranja kod poslanika odnosno parlamentaraca ukažemo na pogubnost ovoga nameta po poslovanje poslodavaca. Tražio sam da se iz obaveze plaćanja dodatne akcize izuzmu privredna vozila (kamioni i autobusi) odnosno utrošeno gorivo za privredne djelatnosti.

Na žalost, imam osjećaj, a volio bih da me isti vara, da ovaj moj apel od odgovornih nije shvaćen ili tretiran kao nešto što bi trebao biti prioritet aktivnosti Udruženja. Posljedice toga te novih nameta, sigurno je da ćemo osjetiti u kratkom vremenskom periodu.

S poštovanjem,

Čengić Safudin